

Óopinber þýðing – enski textinn gildir

Framsalsamningur Breska tryggingarsjóðsins (FSCS) og Tryggingarsjóðs innstæðueigenda og fjárfesta (TIF)

Drög dagsett 8. desember 2010

Framsalsamningur

Framsalsamning þennan („**samninginn**“) hafa gert með sér:

1. **Tryggingarsjóður innstæðueigenda og fjárfesta (TIF)**, sem hefur skráða skrifstofu við Borgartún 26, 105 Reykjavík, Ísland, og
2. **Breski tryggingarsjóðurinn** (Financial Services Compensation Scheme, FSCS), sem hefur skráða skrifstofu á 7. hæð, Lloyds Chambers, 1 Portsoken Street, London E1 8BN, Breska konungsríkið.

Samningsaðilar sem vísað er til í 1. og 2. lið hér að framan verða hvor um sig nefndir í samningi þessum „**samningsaðili**“ og sameiginlega „**samningsaðilar**“.

ÞAR SEM

- A) TIF er sjálfseignarstofnun og er starfræktur í samræmi við íslensk lög og er samkvæmt þeim falinn rekstur tryggingakerfis fyrir innstæðueigendur og fjárfesta með lögum nr. 98/1999 um innstæðutryggingar og tryggingakerfi fyrir fjárfesta.
- B) FSCS hefur umsjón með rekstri breska tryggingarsjóðsins. Sjóðurinn er innlántryggingakerfi stofnsett í Breska konungsríkinu í samræmi við tilskipun EB nr. 94/19/EB um innstæðutryggingar.
- C) Í samræmi við reglur tryggingarsjóðsins hefur útibú sjóðsins í London ákveðið að ganga inn í sjóðinn með því að leggja fram viðbótartryggingu (“top up” cover) fyrir tiltekna innstæðueigendur útibúsins í Breska konungsríkinu.
- D) Hinn 27. október 2008 gaf FME út það álit að Landsbanki Íslands hf. hefði hinn 6. október 2008 verið ófær um að greiða skuldir sínar og því væri TIF í samræmi við 9. gr. laga nr. 98/1999 skuldbundinn til að greiða viðskiptavinum Landsbankans tryggingu, þ.m.t. innstæðueigendur Landsbankans í London.
- E) Breski sjóðurinn bætti aðeins kröfur innstæðueigenda Landsbankans í London að því leyti sem fjárhæð og gildissvið innstæðutryggingakerfisins, að því er varðar innstæðueigendur Landsbankans í London, fóru yfir það hámark sem TIF bar að greiða hverjum innstæðueigenda Landsbankans í London, ef eingöngu íslenska

innstæðutryggingakerfið hefði tekið til þeirra. TIF hefur staðfest við FSCS að hámarksfjárhæð á hvern innstæðueiganda Landsbankans í London sé 16.872,99 sterlingspund á hvern innstæðueiganda (eða þar sem við á handhafa að sameiginlegum reikningi) að teknu tilliti til þess að TIF er ófær um að fjármagna viðbótargreiðslur. Í samræmi við reglur sjóðsins ákvað FSCS hinn 4. nóvember 2008, með vitund TIF, að taka yfir meðferð og greiðslu krafna frá innstæðueigendum Landsbankans í London sem áttu innstæður á „Icesave“-reikningum í útibúi [Landsbankans] í Breska konungsríkinu. Allir innstæðueigendur Landsbankans í London sem áttu innstæður á einum eða fleiri „Icesave“-reikningum (og til viðbótar tilteknir aðrir innstæðueigendur Landsbankans ef þeir uppfylltu skilyrði reglna FSCS um greiðslu trygginga) hafa fengið eða munu fá greiddar tryggingar frá FSCS vegna innlána í útibúinu í Breska konungsríkinu, þ.m.t. vegna krafna sem TIF var skuldbundinn til að greiða hverjum og einum þessara innstæðueiganda.

- F) Í samræmi við framangreint hefur FSCS farið með kröfur innstæðueigenda Landsbankans í London um tryggingar hjá sjóðnum og af hálfu íslenska innstæðutryggingakerfisins. Tryggingar sem FSCS greiðir innstæðueigendum Landsbankans í London af hálfu íslenska innstæðutryggingakerfisins hafa verið forfjármagnaðar af breska fjármálaráðuneytinu.
- G) FSCS hefur fyrir aðilaskipti, framsal eða með annarri yfirfærslu tekið yfir kröfur innstæðueigenda Landsbankans á Landsbankann eða á hendur þriðja aðila vegna þeirra fjárhæða sem þeir hafa fengið greiddar í bætur með bótargreiðslum frá FSCS af hálfu íslenska innstæðutryggingakerfisins (fyrir hönd TIF) og af hálfu sjóðsins sjálfs.
- H) Hinn 23. október 2009 lýsti FSCS nokkrum forgangskröfum við slitameðferð Landsbankans. Slitastjórn hefur einungis tekið afstöðu til einnar af þessum kröfum þar sem krafa FSCS var tekin til greina að verulegu leyti. Slitastjórn hefur hins vegar hafnað að taka til greina afar takmarkaðan hluta af höfuðstól kröfunnar (sem er til umfjöllunar í yfirstandandi sáttameðferð milli FSCS og slitastjórnar) og uppi er ágreiningur á milli FSCS og slitastjórnar varðandi vaxtastig á kröfu FSCS um vexti. Jafnframt hefur slitastjórn hafnað kröfu FSCS um kostnað.
- I) FSCS hefur mótmælt tilteknum ákvörðunum slitastjórnar varðandi kröfur sem FSCS hefur lýst [í bú bankans]. Tilteknir kröfuhafar Landsbankans hafa mótmælt þeirri ákvörðun slitastjórnar að samþykkja kröfu FSCS sem forgangskröfu, bæði að því er varðar höfuðstól og vexti. Slitastjórn

hefur vísað deilunni til úrlausnar fyrir Héraðsdómi Reykjavíkur þar sem málið (mál nr. X-36/2010) er nú til meðferðar.

- J) Þann dag sem þessi samningur er dagsettur, eða því sem næst, hafa TIF, Ísland [Íslensk stjórnvöld] og breska fjármálaráðuneytið gert með sér útgreiðslu-, endurgreiðslu- og skaðleysissamning en samkvæmt honum getur TIF fengið lánað fjármagn frá breska fjármálaráðuneytinu til að a) endurgreiða FSCS vegna þeirra trygginga sem FSCS hefur þegar greitt til innstæðueigenda Landsbankans í London að fjárhæð allt að 16.872,99 sterlingspund til hvers innstæðueiganda um sig (eða, ef við á, handhafa að sameiginlegum reikningi) og tiltekinn kostnað sem samið var um í uppgjörssamningnum og b) til að gera FSCS kleift að greiða (fyrir hönd TIF) kröfur innstæðueigenda Landsbankans í London um tryggingu samkvæmt íslenskum lögum nr. 98/1999, að fjárhæð 16.872,99 sterlingspund til hvers innstæðueiganda um sig.
- L) FSCS og TIF hafa gert með sér þennan samning um skilmála FSCS fyrir að framselja kröfur á íslenska innstæðutryggingakerfið (þ.m.t. kröfur á íslenska innstæðutryggingakerfið sem lýst er á Íslandi) og kostnaðarkröfuna (þ.m.t. kostnaðarkrafan sem lýst er á Íslandi) til TIF til að gera TIF kleift að endurkrefja Landsbankann um greiðslur sem FSCS hefur innt af hendi af hálfu íslenska innstæðutryggingakerfisins fyrir hönd TIF.

HEFUR SAMIST SVO UM EFTIRFARANDI

1. Túlkun

- 1.1 Hugtök sem notuð eru í þessum samningi [og auðkennd með hástaf í frumtextanum] og framangreindum forsendum skulu hafa þá merkingu sem þeim er gefin í Fylgiskjali 1 við samning þennan. Eintala orða skal einnig teljast taka til fleirtölu og *vice versa*. Að auki, nema annað leiði af samhenginu, skulu hugtök sem skilgreind eru í útgreiðslu-, endurgreiðslu- og skaðleysissamningnum, að því leyti sem þau eru ekki skilgreind í Fylgiskjali 1 við samning þennan, hafa sömu merkingu þar sem þau koma fyrir í samningi þessum.

2. Framsal

- 2.1 FSCS framselur TIF hér með frá gildistökudegi:
- i) öll réttindi, bein og óbein, vegna (a) hveðrar kröfu á íslenska innstæðutryggingakerfið sem á gildistökudegi hefur verið

framseld eða á annan hátt yfirfærð til FSCS af hálfu innstæðueigenda Landsbankans í London eða færð þangað í krafti laga eða á hvern annan hátt sem kröfur þessar eru settar fram, og þær er hægt að tilgreina og eiga sér stoð í gögnum FSCS eða öðrum gögnum sem heimilt er að styðjast við í þeim tilgangi að ákveða hvaða kröfur eru framseldar samkvæmt samningi þessum og (b) kostnaðarkröfunnar,

- ii) öll réttindi, bein og óbein, vegna (a) krafna á íslenska innstæðutryggingakerfið lýst á Íslandi sem tengjast hverri slíkri kröfu á íslenska innstæðutryggingakerfið, og
b) kostnaðarkröfu lýst á Íslandi sem tengist kostnaðarkröfunni, og
- iii) öll réttindi og tilkall til sem leiðir af eða tengist i) og ii) að framan að meðtöldum uppsöfnuðum vöxtum vegna krafna á íslenska innstæðutryggingakerfið (og/eða krafna á íslenska innstæðutryggingakerfið lýst á Íslandi) og kostnaðarkröfunnar, þó að því tilskildu að engin krafa á hendur Landsbankanum vegna kostnaðar sem FSCS hefur orðið fyrir við það að fara með kröfur innstæðueigenda Landsbankans í London um bætur samkvæmt gildandi innstæðutryggingakerfi sé framseld TIF önnur en kostnaðarkrafan.

- 2.2 Ennfremur fellst FSCS hér með á, að öll réttindi, bein og óbein, vegna hvaða kröfu á íslenska innstæðutryggingakerfið sem er, sem innstæðueigendur Landsbankans í London hafa framselt honum eða hann hefur komist yfir með samningum, í krafti laga eða annan hátt, skuli eftir gildistökudag sjálfkrafa og án frekari formsatriða framseldar algerlega til TIF frá þeim degi þegar framsal eða annars konar yfirfærsla til hans [FSCS] átti sér stað.
- 2.3 TIF fellst hér með á framsalið og mun FSCS tilkynna Landsbankanum um það í samræmi við 7. mgr. 2. gr. FSCS afhendir Tryggingarsjóði staðfestingu á að slík tilkynning hafi verið send Landsbanka Íslands hf.
- 2.4 Samningsaðilar eru sammála um að leiði framsal eða yfirfærsla FSCS á kröfum á íslenska innstæðutryggingakerfið lýstum á Íslandi og/eða kostnaðarkröfu sem lýst er á Íslandi á TIF til þess að TIF berist greiðsla eða úthlutun er varðar þann hluta krafanna sem ekki teljast kröfur á íslenska innstæðutryggingakerfið eða kostnaðarkröfur þá muni hann þegar honum verður kunnugt um móttöku slíkrar endurheimtu millifæra viðkomandi fjárhæð án tafar til FSCS.

- 2.5 Ef framsal krafna vegna íslenska innstæðutryggingakerfisins sem samningur þessi tekur til reynist ógilt að hluta eða öllu leyti, eða FSCS fær af öðrum ástæðum úthlutað frá Landsbankanum og/eða slitastjórn upp í kröfu á íslenska innstæðutryggingakerfið sem FSCS hefur með samningi þessum samþykkt að framselja TIF, skal FSCS þegar honum verður kunnugt um móttöku slíkrar endurheimtu millifæra án tafar viðkomandi fjárhæðir til breska fjármálaráðuneytisins, af hálfu hollenska ríkisins og breska fjármálaráðuneytisins, til úthlutunar (að loknum nauðsynlegum umreikningi af hálfu breska fjármálaráðuneytisins eða fyrir hönd þess) í samræmi við a-lið 5. mgr. 4. gr. útgreiðslu-, endurgreiðslu- og skaðleysissamningsins. Þær greiðslur sem FSCS innir af hendi í samræmi við þessa gr. 2.5. skulu teljast greiðslur fyrir hönd TIF og inntar af hendi í sama gjaldmiðli og í sömu fjárhæð sem um ræðir og FSCS tók við, með reiðufé, án frádráttar, skuldajöfnunar eða gagnkröfu. Slíkar greiðslur skulu vera án frádráttar eða ábyrgðar vegna skatta, með þeim fyrirvara að beri FSCS samkvæmt gildandi lögum að draga skatta frá slíkum greiðslum, þá hækki fjárhæðin sem greiða ber eftir því sem þörf er á svo breska fjármálaráðuneytið fái að frádrætti loknum fjárhæð sem samsvarar þeirri fjárhæð sem það hefði fengið hefði ekkert verið dregið frá. Ef fjárhæð sem FSCS ber að greiða fellur í gjalddaga samkvæmt ákvæði þessarar gr. 2.5 en er áfram ógreidd, andstætt skilmálum samnings þessa, ber FSCS að greiða TIF vexti sem nema dráttarvöxtum á fjárhæðina. Allir slíkir vextir skulu á hverjum greiðsludegi bætast við höfuðstól þeirrar fjárhæðar sem þeir eru reiknaðir af.
- 2.6 Samanlagður reiknaður höfuðstóll allra krafna á íslenska innstæðutryggingakerfið sem FSCS framselur TIF samkvæmt samningi þessum verður ákvarðaður af slitastjórn. FSCS telur að hinn 24. nóvember 2010 hafi hann innt af hendi greiðslur til innstæðueigenda Landsbankans í London upp í kröfur á íslenska innstæðutryggingakerfið samanlagt að nafnvirði 2.254.417.851,51 sterlingspund.
- 2.7 Innan fimm virkra daga frá gildistökudegi skal FSCS afhenda Landsbanka Íslands hf. tilkynningu um framsal (b.t. skilanefndar og slitastjórnar) sem skal að meginefni vera eins og tilgreint er í Fylgiskjali 2 við samning þennan, (*eyðublað fyrir tilkynningu um framsal*).
- 2.8 Eigi síðar en á gildistökudegi eða eins fljótt og auðið er eftir þann dag skulu samningsaðilar undirrita beiðni um kröfufamsal í samræmi við mát sem slitastjórnin lætur í té vegna krafna á íslenska innstæðutryggingakerfið sem hefur verið lýst Íslandi og kostnaðarkröfunnar sem hefur verið lýst á Íslandi og sem hér með eru framseldar og yfirfærðar. Á gildistökudegi eða fyrir þann dag skal TIF

láta FSCS í té drög að beiðni um kröfuframsals sem sjóðurinn telur að uppfylli kröfur slitastjórnarinnar þar að lútandi. Samningsaðilar samþykkja að undirrita og framvísa slíkri beiðni um kröfuframsals til slitastjórnarinnar á gildistökudeginum eða eins fljótt og auðið er eftir þann dag. Framvísunin skal vera í samræmi við leiðbeiningar á vefsíðu slitastjórnarinnar: <http://lbi.is/winding-upboard-claimsprocess/faqwinding-upboard/>. Samningsaðilar samþykkja að leiði undirritun kröfuframsalsbeiðninnar til slitastjórnarinnar til þess að TIF taki á móti greiðslu eða úthlutun sem rekja má til þess hluta krafanna sem ekki fellur undir kröfur íslenska innstæðutryggingakerfisins eða kostnaðarkröfur, þá muni TIF leggja viðkomandi fjárhæð inn á sérstakan vörslureikning FSCS og greiða hana án tafar til FSCS.

2.9 Að uppfylltu skilyrði lokamálsliðar gr. 2.10 hér á eftir skal FSCS:

- i) innan fimm virkra daga frá gildistökudegi láta í té lista með nöfnum, reikningsnúmerum og stöðu á reikningum þeirra innstæðueigenda Landsbankans í London sem eiga kröfur er varða einhverjar af þeim kröfum á íslenska innstæðutryggingakerfið sem hafa verið framseldar TIF samkvæmt gr. 2.1. að framan, og
- ii.) láta TIF í té á hverjum tíma aðrar þær upplýsingar sem FSCS getur nálgast og TIF getur með sanngirni farið fram á í tengslum við kröfur á íslenska innstæðutryggingakerfið og kostnaðarkröfuna sem hafa verið framseldar TIF samkvæmt gr. 2.2. hér að framan.

2.10 Listinn sem vísað er til að framan skal aðeins nýttur til að tilgreina kröfur á íslenska innstæðutryggingakerfið sem framsalið tekur til og villur í texta eða tölulegar villur skulu ekki valda því að framsalið teljist ógilt eða ógildanlegt. FSCS skal bregðast tafarlaust við beiðni TIF um leiðréttingar á augljósum villum í listanum.

2.11 TIF staðfestir hér með að hann hafi þegar, sem stjórnandi íslenska innstæðutryggingakerfisins, heildarlista yfir nöfn, reikningsnúmer og stöðu reikninga innstæðueigenda Landsbankans í London. TIF staðfestir enn fremur að hvers konar úrvinnsla af hans hálfu á upplýsingum sem hann fær samkvæmt i. lið gr. 8.2 og ii. lið gr. 8.2 að framan verði framkvæmd í samræmi við gildandi íslensk lög um verndun upplýsinga og önnur lög. Afhending upplýsinga samkvæmt i. lið gr. 8.2 og ii. lið gr. 8.2 að framan fer fram í trausti þessara staðfestinga. FSCS er ekki skylt til að láta TIF í té aðrar upplýsingar en þær sem vísað er til í i. lið í 8. mgr.

2. gr. að framan brjóti afhending þeirra eða hætta er á að afhending þeirra brjóti gegn gildandi lögum eða reglugerðum um FSCS (þ.m.t. lög eða reglugerðir sem fjalla um verndun upplýsinga).

- 2.12 Greiðslur frá TIF samkvæmt samningi þessum, þ.m.t. gr. 2.4, skulu vera í sömu mynt og TIF barst og í reiðufé án þess að nokkuð sé dregið af, skuldajafnað eða að gagnkrafa verði gerð, og lagðar á reikning í London, sem FSCS tilkynnir TIF um, með að minnsta kosti fimm virkra daga fyrirvara. Slíkar greiðslur skulu vera án frádráttar eða ábyrgðar vegna skatta, þó að teknu tilliti til þess að hvíli sú skylda á TIF samkvæmt gildandi lögum að draga skatta frá slíkum greiðslum þá hækki fjárhæðin sem greiða ber eftir því sem þörf er á svo breski tryggingarsjóðurinn fái að frádrætti loknum fjárhæð sem samsvarar þeirri fjárhæð sem hann hefði fengið hefði ekkert verið dregið frá. Ef fjárhæð sem TIF ber að greiða fellur í gjalddaga samkvæmt gr. 2.4 en er áfram ógreidd, andstætt skilmálum samnings þessa, ber TIF að greiða FSCS dráttarvexti á fjárhæðina. Allir slíkir vextir skulu á hverjum greiðsludegi bætast við höfuðstól þeirrar fjárhæðar sem þeir eru reiknaðir af.
- 2.13 Í samræmi við 2. mgr. 4. liðar uppgjörssamningsins fellst TIF hér með á:
- 2.13.1 að því marki sem FSCS heldur eftir hluta kröfu, sem framseld hefur verið í samræmi við gr. 2.1. og 2.2. hér að framan, (vegna þess að krafan er að öllu samanlögðu hærri en 16.872,99 sterlingspund), þá skal sá hluti þeirrar kröfu sem svarar til kröfu á íslenska innstæðutryggingakerfið, eftir ítrustu heimild gildandi laga, að öllu leyti talinn jafnstæður [pari passu] öðrum hlutum sömu kröfu sem eru hluti af þeim kröfum sjóðsins sem FSCS heldur eftir:
- 2.13.2 komi til þess, hver sem ástæðan kann að vera (þ.m.t., án þess að takmarkast við, ef TIF er veittur hvers konar forgangsréttur samkvæmt íslenskum lögum) eftir framsal kröfu samkvæmt gr. 2.1. og 2.2. að framan, að annað hvort FSCS eða TIF endurheimti hlutfallslega stærri hluta slíkrar kröfu en hinn aðilinn, skal FSCS eða TIF (eftir því sem við á) greiða eins fljótt og því verður við komið, nema gr. 2.13.3 að neðan eigi við, greiðslur til að jafna hlut hins aðilans, eftir því sem þörf er á, til að tryggja að endurheimtuhlutfall FSCS og TIF, hvors um sig, sé hið sama, en
- 2.13.3 ef (i) íslenskur dómstóll kveður upp endanlegan og óafryjjanlegan dóm um að (1) krafa eða einhver hluti kröfu sem framseld hefur verið TIF eða réttindi sem FSCS heldur eftir, eftir því sem við á, muni njóta forgangs við úthlutun úr búi Landsbankans umfram aðrar kröfur sem eiga rót í sömu innstæðum, og (2) hann er ekki í andstöðu við ráðgefandi álit EFTA dómstólsins að því er forgang þennan varðar, eða (ii) slitastjórn Landsbankans ákveður að krafa eða einhver hluti kröfu sem framseld

hefur verið TIF eða réttindi sem FSCS heldur eftir, eftir því sem við á, skuli njóta forgangs við úthlutun úr búi Landsbankans umfram aðrar kröfur sem eiga rót í sömu innstæðum og slík ákvörðun er ekki borin undir íslenskan dómstól af neinum innstæðueiganda eða kröfuhafa og aðgerðarleysi í því efni stafar ekki af því að það sé erfitt eða ómögulegt að bera slíka ákvörðun undir dómstóla vegna breytinga á íslenskum lögum eftir 5. júní 2009, þá gilda ákvæði liðar 2.13.2 að framan um skyldu TIF eða FSCS, eftir atvikum, um greiðslu jöfnunargreiðslna ekki nema forgangurinn stafi af breytingum á íslenskum lögum eftir 5. júní 2009,

og „breyting á íslenskum lögum“ skal í þessari gr. 2.13. merkja gildistaka laga, reglna eða stjórnvaldsfyrirmæla eða hvers konar breyting á lögum, reglum eða stjórnvaldsfyrirmælum, að undanskildum hverjum þeim lögum, reglum eða stjórnvaldsfyrirmælum eða breytingum á þeim sem er krafist eða sem eru innleidd samkvæmt reglugerð eða tilskipun Evrópubandalagsins (hvort heldur er beint eða á grundvelli samningsins um Evrópska efnahagssvæðið).

3. Viðbótarréttindi

3.1 Aðilar eru sammála um að hver krafa vegna íslenska innstæðutryggingakerfisins taki til:

- a. höfuðstóls slíkrar kröfu, sem getur ekki orðið hærri en 16.872,99 sterlingspund á hvern innstæðueiganda Landsbankans í London (eða, ef við á, handhafa að sameiginlegum reikningi), og
- b. allra krafna um vexti og/eða aðrar fjárhæðir sem fallið hafa eða kunna að falla á höfuðstólinn eða á annan hátt leggjast á hann í krafti laga.

3.2 TIF staðfestir hér með að kröfum á íslenska innstæðutryggingakerfið fylgi ekki réttur FSCS til að lýsa kröfu við slitameðferð Landsbankans vegna kostnaðar (sem er ekki hluti af kostnaðarkröfunni) og útgjalda sem FSCS hefur orðið fyrir við að framfylgja kröfu sinni vegna framseldu krafanna (þ.m.t. kröfur á íslenska innstæðutryggingakerfið) við slitameðferð Landsbankans.

4. Frekari staðfestingar

4.1 Hvor samningsaðili um sig skal, á eigin kostnað, sjá um að gera eða láta gera allar þær aðgerðir og annað það sem með sanngirni má ætlast til að sé gert og annast gerð allra þeirra skjala, eða sjá um að þau séu gerð sem raunhæft er að fara fram á svo samningur þessi öðlist fullt gildi.

- 4.2 Án þess að það hafi áhrif á efni gr. 4.1. og án þess að það skerði gr. 2.7. og 2.8. mun FSCS verða við sanngjörnum beiðnum TIF um að annast gerð (svo fljótt sem framkvæmanlegt er) nauðsynlegra skjala sem TIF kann að þarfnast til að staðfesta eða sannreyna upprunalegan rétt FSCS að því er varðar kröfur á íslenska innstæðutryggingakerfið og kostnaðarkröfuna, til að tryggja kröfur á íslenska innstæðutryggingakerfið, kostnaðarkröfuna, kröfur á íslenska innstæðutryggingakerfið sem lýst er á Íslandi og kostnaðarkröfurnar sem lýst er á Íslandi, til að umbreyta réttindum sem byggja á sanngirnirétti þannig að þau falli undir sett lög (sé það lagalega mögulegt), til að staðfesta eða fullnusta réttindi TIF varðandi kröfur á íslenska innstæðutryggingakerfið, kostnaðarkröfuna, kröfur á íslenska innstæðutryggingakerfið sem lýst er á Íslandi og kostnaðarkröfurnar sem lýst er á Íslandi og til þess að TIF geti neytt réttar síns til að gera kröfu við slitameðferð Landsbankans í kröfur á íslenska innstæðutryggingakerfið, kostnaðarkröfuna, kröfur á íslenska innstæðutryggingakerfið sem lýst er á Íslandi og kostnaðarkröfurnar sem lýst er á Íslandi.
- 4.3 Án þess að það hafi áhrif á efni gr. 4.1. mun TIF, verða við sanngjörnum beiðnum FSCS, um að annast gerð (svo fljótt sem framkvæmanlegt er) nauðsynlegra skjala sem FSCS kann að þarfnast til að staðfesta eða sannreyna réttindi FSCS að því er varðar kröfur sjóðsins, til að tryggja að kröfur sjóðsins verði áfram hjá (eða færðar til) FSCS, til að umbreyta réttindum sem byggja á sanngirnirétti þannig að þau falli undir sett lög (sé það lagalega mögulegt), til að staðfesta eða fullnusta réttindi FSCS í kröfum sjóðsins og hvernar annarrar kröfu FSCS, þ.m.t., án þess að það sé bundið við kröfu vegna kostnaðar, til að neyta réttar síns til að lýsa kröfum í slitameðferð Landsbankans að því er varðar kröfur sjóðsins eða aðra kröfu.
- 4.4 Til að taka af vafa merkir framangreint ekki að aðilar ábyrgist að það framsal sem fram fer samkvæmt samningi þessum taki gildi né að það sé viðurkennt eða verði viðurkennt af slitastjórninni.
- 4.5 Samningsaðilar skulu forðast allar þær aðgerðir, þ.m.t. en ekki bundið við, dómsmál, gerðardómsmeðferð og úrskurði þriðja aðila, sem ástæða er til að ætla að gæti staðið í vegi fyrir réttindum TIF að því er varðar kröfur á íslenska innstæðutryggingakerfið eða kostnaðarkröfuna, sem eru framseldar samkvæmt samningi þessum, og/eða rétti eða réttindum FSCS að því er varðar þann hluta krafna sem FSCS heldur eftir (vegna þess að slík krafa er samanlagt hærri en 16.872,99 sterlingspund) og allar aðrar kröfur FSCS, þ.m.t. en þó ekki bundið við, kröfu vegna kostnaðar. Eins

og greinir í gr. 4.6. skulu samningsaðilar hvorki fara fram á dómstólameðferð né bera fyrir sig dóma eða úrskurði er varða slíkar kröfur ef slíkur dómur eða úrskurður fer ekki saman við rétt TIF og/eða rétt FSCS sem vísað er til í undanfarandi málslið.

- 4.6 TIF getur hvenær sem er haldið því fram að krafa hans eða kröfur við slitameðferð Landsbankans ættu að njóta forgangs við greiðslur úr búi Landsbankans umfram útistandandi kröfur FSCS (slík rök nefnast „málsástæður fyrir sérstökum forgangi“) og FSCS getur andmælt slíkum rökum fyrir sérstökum forgangi sem TIF setur fram við slitastjórn Landsbankans, fyrir dómi, eða við sáttumleitun sem kann að vera undanfari dómsmeðferðar eða á annan hátt. Hvorki TIF né FSCS mega þó bera brögður á réttmæti, fjárhæð eða forgang (að undanskildum málsástæðum fyrir sérstökum forgangi) kröfu hins samningsaðilans við slitameðferð Landsbankans.
- 4.7 TIF skal eigi síðar en á gildistökudag draga til baka röksemdir sem hann hefur áður fært fram, hvort sem er fyrir slitastjórn Landsbankans, fyrir dómi eða á annan hátt, varðandi réttmæti, fjárhæð eða forgang (að undanskildum málsástæðum fyrir sérstökum forgangi) kröfu FSCS við slitameðferð Landsbankans og kappkosta að því marki sem að öðrum kosti yrði litið á sem brot á þessum lið til að tryggja að málsmeðferð eða málaferli sem hann hefur stofnað til, hvort sem er fyrir slitastjórn Landsbankans eða fyrir dómi eða öðrum aðila með dómsvald, verði felld niður.

5. Eftirgjöf og skaðleysi

- 5.1 Samningsaðilar samþykkja hér með að eftir gildistökudag muni: (A) FSCS ekki eiga (og að því marki sem nauðsynlegt er fellur hann óafturkallanlega frá slíkum kröfum) neina kröfu á hendur TIF eða Íslandi varðandi greiðslu FSCS á tryggingum vegna krafna innstæðueigenda Landsbankans í London af hálfu íslenska innstæðutryggingakerfisins aðrar en þær sem tilgreindar eru í samningi þessum og útgreiðslu-, endurgreiðslu- og skaðleysissamningnum eða sem heimilaðar eru samkvæmt skilmálum annars hvors þessara samninga; og (B) TIF ekki eiga (og að því marki sem nauðsynlegt er fellur hann óafturkræft frá slíkum kröfum) neina kröfu á hendur FSCS varðandi þær kröfur sem tilgreindar eru í (A), þ.m.t. en ekki bundið við kröfur sem FSCS hefur lýst gagnvart slitastjórninni og/eða ágreininginn sem vísað er til í I-lið framangreindra forsendna, aðrar en þær sem tilgreindar eru eða heimilaðar í samningi þessum.

- 5.2 TIF skal innan fimm virkra daga frá gildistökudegi greiða FSCS 333.000 evrur upp í kostnað sem FSCS hefur stofnað til í tengslum við aðgerðir sjóðsins i) til að ganga úr skugga um réttmæti þeirra krafna sem vísað er til í A-lið gr. 5.1. hér að framan gagnvart slitastjórninni og ii) vegna ágreiningsmálsins sem rekið er fyrir Héraðsdómi Reykjavíkur og vísað er til í B-lið gr. 5.1. hér að framan.

6. Kostnaður og útgjöld

- 6.1 TIF skal bera allan kostnað sem greiða þarf slitastjórninni eða opinberum stjórnvöldum, hverju nafni sem þau nefnast, á Íslandi vegna framsals krafna á íslenska innstæðutryggingakerfið sem lýst er á Íslandi sem tengjast hverri kröfu á íslenska innstæðutryggingakerfið og kostnaðarkröfunnar sem lýst er á Íslandi og tengist kostnaðarkröfunni.
- 6.2 Án þess að hafa áhrif á önnur ákvæði samnings þessa eða skilmála útgreiðslu-, endurgreiðslu- og skaðleysissamningsins skal hvor aðili um sig bera eigin kostnað og útgjöld í tengslum við undirbúning, viðræður og gerð samnings þessa og allra tengdra skjala.

7. Skilmálar sem felldir eru inn með tilvísun

Ákvæði greina 10.3 (Eftirgjöf réttinda), 10.5 (Breytingar o.fl.), 10.8 (Samhljóða eintök) og 10.11 (Fallið frá friðhelgisréttindum) í útgreiðslu-, endurgreiðslu- og skaðleysissamningnum eru felld inn í samning þennan eins og þau séu tilgreind í heild í samningi þessum og skulu tilvísanir í viðkomandi málsgreinum til „samnings þessa“ lesast sem tilvísanir í samning þennan, nema þegar annað leiðir af samhenginu, og tilvísanir í viðkomandi málsgreinum til „samningsaðila“ lesast sem tilvísanir í samningsaðila samnings þessa, nema þegar annað leiðir af samhenginu.

8. Gildandi lög og lögsaga

- 8.1 Með fyrirvara um gr. 8.2. og 8.3. hér á eftir skulu samningur þessi, þ.m.t. þau ákvæði útgreiðslu-, endurgreiðslu- og skaðleysissamningsins sem eru felld inn í samning þennan samkvæmt gr. 7 í samningi þessum, og öll mál, krafa eða ágreiningsefni sem rísa vegna eða í tengslum við samning þennan, hvort sem þau eru innan eða utan samninga, lúta að og túlkast samkvæmt lögum Englands og Wales.
- 8.2 Að því marki sem gr. 2.1. og 2.2. í samningi þessum leiða til framsals og yfirfærslu á kröfum á íslenska innstæðutryggingakerfið sem lýst er á Íslandi og/eða kostnaðarkröfu sem lýst er á Íslandi skal slíkt framsal og

yfirfærsla lúta íslenskum lögum.

- 8.3 Framsöl og yfirfærslur sem gerð eru með samningi þessum fara fram í skilningi og í samræmi við 115. gr. íslensku laganna um gjaldþrotaskipti og fl. nr. 21/1991.
- 8.4 Sérhvert ágreiningsefni sem kemur upp milli TIF eða FSCS vegna eða í tengslum við samning þennan, hvort sem það er innan eða utan samnings, þ.m.t. ágreiningsefni varðandi tilvist, lögmæti eða riftun samnings þessa skulu einungis lúta lögsögu enskra dómstóla.

9. Tilkynningar

- 9.1 Öll boðskipti sem eiga að fara fram samkvæmt eða í tengslum við samning þennan, að undanskildum boðskiptum sem um getur í gr. 2.7. að framan, skulu fara fram skriflega á ensku og, nema annað sé tekið fram, vera í formi bréfs eða símbréfs (þau má afrita og senda með tölvupósti en slíkt telst ekki vera gild afhending). Samskiptin sem vísað er til í gr. 2.8. mega fara fram með tölvupósti.
- 9.2 Heimilisfang og bréfasímanúmer hvers samningsaðila (og deildin eða embættismaðurinn, ef um það er að ræða, sem orðsendingunni skal beint til) vegna allra samskipta sem eiga að fara fram samkvæmt eða í tengslum við samning þennan skal vera:

- i) ef um er að ræða FSCS: Financial Services Compensation Scheme, 7th Floor, Lloyds Chambers, 1 Portsoken Street, London E1 8BN, United Kingdom; mark.neale@fscs.org.uk og +44 (0)20 7892 7637 (attention: Mark Neale, Chief Executive), afrit sent breska fjármálaráðuneytinu, HM Treasury, 1 Horse Guards Road, London SW1A 2HQ, United Kingdom; tom.scholar@hmtreasury.gsi.gov.uk and +44 (0)20 7270 5764 (attention: Tom Scholar), og
- ii) ef um er að ræða TIF: Borgartún 26, 3. hæð, 105 Reykjavík, Ísland, og +354 590 2606 (b.t. framkvæmdastjóra)

eða, í hverju tilviki fyrir sig, sérhvert það annað heimilisfang eða bréfasímanúmer (eða deild eða embættismaður) sem einhverjum hinna fyrrnefndu er heimilt að tilkynna um til hinna með minnst fimm virkra daga fyrirvara.

ÞESSU TIL STAÐFESTU hafa samningsaðilar undirritað samning þennan á

þeim dögum sem að neðan greinir.

(Tryggingarsjóður innstæðueigenda og fjárfesta)

Af:

Dagsetning:

Nafn:

Titill:

Dagsetning:

Nafn:

Titill:

Breski tryggingarsjóðurinn

Af:

Dagsetning:
Nafn:
Titill:

Dagsetning:
Nafn:
Titill:

FYLGISKJAL 1

Skilgreiningar

Gildandi lög	eru hvers kyns viðeigandi sett lög og réttur, reglugerðir, tilskipanir, reglur, dómar, fordæmisréttur, fyrirmæli, úrskurðir, samþykki, heimildir, sérleyfi, umboð, leyfi, samningar, tilskipanir, leiðbeiningar, stefnumarkanir, skilyrði eða aðrar takmarkanir stjórnvalda eða sambærilegar ákvarðanir eða úrskurðir af hálfu stjórnvalds (eða hvers kyns túlkun eða framkvæmd þeirra), hvort heldur sem slík lög eru í gildi á dagsetningu samnings þessa eða taka gildi síðar
Dráttarvextir (Arrears Rate)	að því er varðar hvaða fjárhæð sem er, hvaða dag sem er, skal miðað við lögboðna vexti skv. 17. hluta [section 17] í <i>Judgments Act 1838</i>
Virkur dagur	er hver sá dagur (annar en laugardagur eða sunnudagur) þegar viðskiptabönkum er ekki heimilt eða skylt að loka í Reykjavík (á Íslandi) eða í London
Krafa	krafa innstæðueiganda Landsbankans í London á Landsbankann sem FSCS hefur tekið yfir þar sem, eða í tengslum við að, FSCS greiddi innstæðueiganda Landsbankans í London samkvæmt og/eða af hálfu sjóðsins og/eða íslenska innstæðutryggingakerfisins. Sérhver krafa getur hvort heldur sem er verið krafa á íslenska innstæðutryggingakerfið eða sjóðinn eða hvort tveggja
Kostnaðarkrafa	krafa á hendur Landsbankanum vegna kostnaðar sem FSCS hefur orðið fyrir við það að annast kröfur innstæðueigenda Landsbankans í London vegna trygginga samkvæmt gildandi innstæðutryggingakerfi, allt að 10 milljónum sterlingspunda
Útgreiðslu-, endurgreiðslu og skaðleysissamningur	útgreiðslu-, endurgreiðslu- og skaðleysissamningurinn sem breska fjármálaráðuneytið, Ísland og TIF gerðu með sér þann dag sem þessi samningur er dagsettur eða um svipað leyti
Gildistökdagur	er sá dagur þegar útgreiðslu-, endurgreiðslu- og

	skaðleysissamningurinn tekur gildi í samræmi við 1. mgr. 7. gr. hans (<i>gildistöskilyrði</i>)
FSCS	Financial Services Compensation Scheme Limited (company registration number: Breski tryggingarsjóðurinn (Financial Services Compensation Scheme Limited) (skráningarnúmer: 3943048), sem hefur skráða skrifstofu á 7. hæð, Lloyds Chambers, 1 Portsoken Street, London E1 8BN, Breska konungsríkið
FME	Fjármálaeftirlitið á Íslandi
Stjórnvald	er hver sú þjóð eða ríkisstjórn, ríki eða sveitarfélag, hvers kyns fjölþjóðastofnun eða sambærileg stofnun eða hvers kyns önnur stjórnardeild, stjórnarstofnun eða pólitísk undirdeild slíkra stofnana og hver sá aðili annar sem fer með framkvæmdarvald, löggjafarvald, dómsvald, peningavald, eftirlitshlutverk eða stjórnvísuluhlutverk á vegum stjórnvalda
Breska fjármálaráðuneytið	Umboðsmenn breska fjármálaráðuneytisins
Kröfur á íslenska innstæðutryggingakerfið lýst á Íslandi	krafa 1 með tilvísunarnúmeri 200910-1459 lögð fram af FSCS 23. október 2009 (eins og henni var breytt 30. október 2009) hjá slitastjórn að því er varðar (og að því leyti sem hún tengist) kröfur á íslenska innstæðutryggingakerfið
Kostnaðarkröfur lýst á Íslandi	krafa 1 með tilvísunarnúmeri 200910-1459 lögð fram af FSCS 23. október 2009 (eins og henni var breytt 30. október 2009) hjá slitastjórn að því er varðar (og að því leyti sem hún tengist) kostnaðarkröfuna
Íslenska innstæðutryggingakerfið	íslenska innstæðutryggingakerfinu var komið á fót með lögum nr. 98/1999, hámarkstryggingarfjárhæð fyrir innstæðueiganda Landsbankans í London er ákvörðuð 16.872,99 sterlingspund (með tilliti til þess að TIF er ófær um að fjármagna viðbótargreiðslur)
Kröfur á íslenska innstæðutryggingakerfið	sérhver krafa að því leyti sem hún hefur verið tekin yfir af FSCS frá viðkomandi innstæðueiganda Landsbankans í London þar sem, eða í tengslum við að, FSCS hefur greitt innstæðueiganda Landsbankans í London af hálfu íslenska innstæðutryggingakerfisins

Landsbankinn	Landsbanki Íslands hf. og/eða Landsbanki Íslands hf., útibúið í London, eftir því í hvaða samhengi orðið er notað
Landsbanki Íslands hf.	Landsbanki Íslands hf., fyrirtæki með takmarkaðri ábyrgð sem stofnað er samkvæmt íslenskum lögum.
Innstæðueigendur Landsbankans í London	einstaklingar eða lögaðilar sem lögðu inn fjármuni eða á annan hátt áttu inneign hjá útibúi Landsbanka Íslands hf. í London
Útibúið í London	Útibú Landsbanka Íslands hf. í London
Greiðsludagur	1. janúar, 1. apríl, 1. júlí og 1. september ár hvert
Breski tryggingarsjóðurinn	Breski tryggingarsjóðurinn sem stofnaður var samkvæmt XV. hluta bresku fjármálaþjónustu- og markaðslöggjafarinnar frá árinu 2000
Kröfur sjóðsins	krafa að því leyti sem FSCS hefur tekið hana yfir frá viðkomandi innstæðueiganda Landsbankans í London að undanskildum þeim hluta sem FSCS hefur eignast vegna greiðslu til innstæðueiganda Landsbankans í London af hálfu íslenska innstæðutryggingakerfisins
Skattar	allir núgildandi og síðari tekjuskattar, stimpilgjöld, skráningargjöld og aðrir skattar, álagningar og álögur, staðgreiðsluskattar og gjöld, hvaða nafni sem þau nefnast, og allir vextir, dráttarvextir og annað sem við kann að bætast eða á að leggjast vegna vangreiðslu þeirra, hvort sem slíkir skattar eru nú eða síðar reiknaðir, lagðir á eða innheimtir af hvaða stjórnvaldi sem er í tengslum við samning þennan, greiðslur samkvæmt samningi þessum eða vegna þinglýsingar, lögbókunar eða annarrar opinberrar skráningar þeirra
TIF	Tryggingarsjóður innstæðueigenda og fjárfesta er sjálfseignarstofnun sem er starfrækt í samræmi við íslensk lög og er samkvæmt þeim falið að reka innstæðutryggingakerfi í samræmi við ákvæði laga nr. 98/1999 um innstæðutryggingar og tryggingakerfi fyrir fjárfesta
Slitastjórn	Slitastjórn Landsbanka Íslands hf.

FYLGISKJAL 2

Eyðublað fyrir tilkynningu um framsal (Form of Notice of Assignment)

Comment [A1]: Er hér hugsanlega frekar átt við "lagalegt form tilkynningar um framsal"?

TILKYNNING UM FRAMSAL

Til: **Landsbanka Íslands hf.**
Austurstræti 11
155 Reykjavík
Ísland

b.t.: Skilanefndar

Afrit: **Tryggingarsjóður innstæðueigenda og fjárfesta**
Borgartún 26
105 Reykjavík
Ísland

b.t.: Framkvæmdastjóra

Afrit: Landsbanki Íslands hf.
Austurstræti 16
101 Reykjavík
Ísland

B.t.: Slitastjórnar

Slitastjórn Landsbanka Íslands hf.

c/o Epiq Systems Limited
11 Old Jewry, 4th Floor
London, EC2R ADU

B.t.: Landsbanki Claim Transfer Agent

Frá: **Breski tryggingarsjóðurinn** (Financial Services Compensation Scheme, FSCS), sem hefur skráða skrifstofu á 7. hæð, Lloyds Chambers, 1 Portsoken Street, London E1 8BN, Breska konungsríkið.

[Ávarp],

Eins og yður mun vera kunnugt, hefur FSCS gert TIF kleift að standa við skuldbindingar sínar gagnvart innstæðueigendum Landsbankans í London sem

falla undir íslenska tryggingakerfið með því að greiða þeim fyrir hönd TIF.

Hér með er yður tilkynnt að samkvæmt framsalssamningi („framsalssamningurinn“) dags. [] 2010 milli FSCS og TIF (sbr. hjálagt afrit) gildir eftirfarandi:

- A) Frá og með [] 2010 framselur og yfirfærir FSCS til TIF öll réttindi, bein og óbein, vegna krafna á íslenska innstæðutryggingakerfið (og krafna á íslenska innstæðutryggingakerfið lýst á Íslandi) sem, miðað við gildistöðudag, höfðu áður verið framseldar til FSCS af innstæðueigendum Landsbankans í London eða voru fengnar FSCS í krafti laga eða á annan hátt. Til að taka af allan vafa, er vakin athygli á að hver krafa á íslenska innstæðutryggingakerfið getur ekki orðið hærri en 16.872,99 sterlingspund fyrir hvern innstæðueigenda Landsbankans í London (eða, ef við á, handhafa að sameiginlegum reikningi). Það sem eftir stendur af kröfum mun verða eftir hjá FSCS. Að því er varðar kröfur á íslenska innstæðutryggingakerfið sem gilda frá [] 2010 þá hefur kostnaðarkrafan (og kostnaðarkröfurnar sem lýst hefur verið á Íslandi) að fjárhæð 10 milljónir punda verið framseld til TIF.
- B) Upplýsingar um nöfn, reikningsnúmer og stöðu á reikningum viðkomandi innstæðueigenda Landsbankans í London eru gefnar upp í listanum sem vísað er í gr. 2.8. í framsalssamningnum og fenginn er frá TIF og fylgja samningi þessum og/eða finna má og eða fá staðfestingu fyrir í gögnum FSCS eða öðrum gögnum sem heimilt er að nota til að ganga úr skugga um hvaða kröfur eru framseldar samkvæmt framsalssamningnum, og

framsöl þau sem komið er til leiðar með samningi þessum fara fram í skilningi og í samræmi við 115. gr. íslensku laganna um gjaldþrotaskipti og fl. nr. 21/1991.

Af ofangreindu framsali leiðir að framvegis skuluð þér eingöngu eiga samskipti við TIF að því er varðar kröfur á íslenska innstæðutryggingakerfið (og kröfur á íslenska innstæðutryggingakerfið sem lýst er á Íslandi) og kostnaðarkröfuna (og kostnaðarkröfur sem lýst er á Íslandi) og þér getið eingöngu leyst yður undan skuldbindingum að því er kröfur þessar varðar með greiðslum til TIF.

Það staðfestist hér með FSCS verður áfram eigandi að kröfunum að því leyti sem þær eru ekki kröfur á íslenska innstæðutryggingakerfið (og kröfur á íslenska innstæðutryggingakerfið sem lýst er á Íslandi) og að yður er rétt að halda áfram að eiga samskipti við FSCS að því er varðar þann hluta krafanna, þ.m.t., meðal annars, alla vextir sem (sá hluti) krafanna kann að hafa borið, og að þér getið eingöngu leyst yður undan skuldbindingunum, hvað þá varðar, með greiðslu til FSCS.

Hugtök sem notuð eru í þessari tilkynningu skulu hafa þá merkingu sem gefin er í Viðauka A við tilkynningu þessa.

Virðingarfyllst,

Undirritað fyrir og fyrir hönd
Breski tryggingarsjóðurinn

VIÐAUKI A

við tilkynningu um framsal

Skilgreiningar

Krafa	er krafa innstæðueiganda Landsbankans í London á Landsbankann sem FSCS hefur tekið yfir þar sem, eða í tengslum við að, FSCS greiddi innstæðueiganda Landsbankans í London samkvæmt og/eða af hálfu sjóðsins og/eða íslenska innstæðutryggingakerfisins. Sérhver krafa getur hvort heldur sem er verið krafa á íslenska innstæðutryggingakerfið eða sjóðinn eða hvort tveggja.
Kostnaðarkrafa	er krafa á hendur Landsbankanum vegna kostnaðar sem FSCS hefur orðið fyrir við það að annast kröfur innstæðueigenda Landsbankans í London vegna trygginga samkvæmt gildandi innstæðutryggingakerfi, allt að 10 milljónum sterlingspunda
Breski tryggingarsjóðurinn	Breski tryggingarsjóðurinn sem stofnaður var samkvæmt XV. hluta bresku fjármálaþjónustu- og markaðslöggjafarinnar frá árinu 2000
Kröfur sjóðsins	krafa að því leyti sem FSCS hefur tekið hana yfir frá viðkomandi innstæðueiganda Landsbankans í London að undanskildum þeim hluta sem FSCS hefur eignast vegna greiðslu fyrir hönd íslenska innstæðutryggingakerfisins til innstæðueiganda Landsbankans í London
FSCS	Financial Services Compensation Scheme Limited (company registration number: Breski tryggingarsjóðurinn (Financial Services Compensation Scheme Limited) (skráningarnúmer: 3943048), sem hefur skráða skrifstofu á 7. hæð, Lloyds Chambers, 1 Portsofen Street, London E1 8BN, Breska konungsríkið
Kröfur á íslenska innstæðutryggingakerfið lýst á Íslandi	krafa 1 með tilvísunarnúmeri 200910-1459 lögð fram af FSCS 23. október 2009 (eins og henni var breytt 30. október 2009) hjá slitastjórn vegna (og að því leyti sem hún varðar) kröfur á íslenska innstæðutryggingakerfið

Kostnaðarkröfur lýst á Íslandi	krafa 1 með tilvísunarnúmeri 200910-1459 lögð fram af FSCS 23. október 2009 (eins og henni var breytt 30. október 2009) hjá slitastjórn vegna (og að því leyti sem hún varðar) kostnaðarkröfur
Íslenska innstæðutryggingakerfið	íslenska innstæðutryggingakerfinu var komið á fót með lögum nr. 98/1999, hámarkstryggingarfjárhæð fyrir innstæðueiganda Landsbankans í London er ákvörðuð 16.872,99 sterlingspund (með tilliti til þess að TIF er ófær um að fjármagna viðbótargreiðslur)
Kröfur á íslenska innstæðutryggingakerfið	sérhver krafa að því leyti sem hún hefur verið tekin yfir af FSCS frá viðkomandi innstæðueiganda Landsbankans í London þar sem eða í tengslum við að FSCS hefur greitt innstæðueiganda Landsbankans í London af hálfu íslenska innstæðutryggingakerfisins
Landsbankinn	Landsbanki Íslands hf. og/eða Landsbanki Íslands hf., útibúið í London, eftir því í hvaða samhengi orðið er notað
Landsbanki Íslands hf.	Landsbanki Íslands hf., fyrirtæki með takmarkaðri ábyrgð sem stofnað er samkvæmt íslenskum lögum.
Innstæðueigendur Landsbankans í London	einstaklingar eða lögaðilar sem lögðu inn fjármuni eða á annan hátt áttu inneign hjá útibúi Landsbanka Íslands hf. í London
Útibúið í London	Útibú Landsbanka Íslands hf. í London
TIF	Tryggingarsjóður innstæðueigenda og fjárfesta er sjálfseignarstofnun sem er starfrækt í samræmi við íslensk lög, og er samkvæmt þeim falið að reka innstæðutryggingakerfi í samræmi við ákvæði laga nr. 98/1999, um innstæðutryggingar og tryggingakerfi fyrir fjárfesta